



Dato 03.06.2025

Inatsisartut suleriaasianni § 37, imm. 1 naapertorlugu apeqquitiit tulluittut Naalakkersuisunut saqqummiuppakka.

Naalakkersuisunut apeqquut:

1. Illoqarfinni 1600-t inorlugit innuttaqartuni nakorsat nal. 16.00-p 08.00-llu akornanni pigaartuusarnerata peerneqarsimaneranik aalajangertoqarsimamera ilumoortuua?
 - A. Akissut aappiuppat, taamatut aalajangernermut suna tunngaviua, aalajangernerlu peqqissutsimik suliaqarnermik, aaqqissussaanikkut aningaasaqarnermilluunniit toqqammaveqarpa?
 - B. Oqartussaq sorleq tassunga aalajangiiva? Oqartussat, suliamik ingerlartsisut kattuffiilluunniit sorliit taamatut aalajangernermut akuuppat?
 - C. Akissut aappiuppat, piffinni kalluarneqartuni innuttaasunut, kommunalbestyrelsinut/kommuninut kiisalu peqqinnissaqarfimmi sulisunut sammititamik oqaloqatiginnittoqarpa nalunaaruteqartoqarpaluunniit?
2. Apeqquut 1-mut akissutit eqqortuuppata, peqqinnissaqarfiup qanoq annertutigisumik sipaarnissaa naatsorsorneqarsimava, naatsorsukkamilu aalajangernerup soraartoqarnera sulisunilluunniit, nakorsaannaanngitsunik tigumminnissinnaannginneq tunngavigalugu taartaagallartunik amerlanerusunik atorfinitsitsisoqariataarsinnaaneranik aarlerinaat eqqumaffigineqarsimava?
 - a. Akissut aappiuppat, Naalakkersuisut aalajangerneq manna pillugu qanoq innuttaasunut nalunaarpat?
 - b. Akissut naamiuppat, taamatut aalajangernissaq maanna isumaliutigineqarpa imaluunniit taamaaliornissamut sukumiisumik pilersaaruteqartoqarpa?

(Inatsisartunut ilaasortaq Paarma Lund Kreutzmann, Inuit Ataqatigiit)

Tunngavilersuut:

Illoqarfinni 1600-t inorlugit innuttalinni nalunaaquttap 16:00 08:00-llu akornanni nakorsat pigaartut peerneqarnerat aalajangiunneqarsimasoq, immaqalu aamma peerneqareersoq paasivara. Aalajangerneq taanna isumaqatiginngitsupilussuua, aarlerinartorujussuutullu isigalugu.

Illoqarfinni arlalinni nakorsat pigaarneruusarnerata atorunnaarsinnera nunatta innuttaanut sullissinermik ajornerulersitsisoq, nunallu immikkoortuini qitiusoqarfiit avataanni nakorsanik atorfinitsitsiniartarnermut sulisoqaannarniartarnermullu ajornakusoornerulersitsisoq isumaqarpunga. Piffinni kalluarneqartuni nakorsanik saaffissaarunneq innuttaasunut toqqissisimajunnaartitsissaaq. Taamaaliornep peqqinnissaqarfimmi sulisunik allanik ilungersortitsilerlunilu tatinissaanut aarlerinaateqarpoq, taamaattoqarneranilu sulil ulapinnerullutik sulisariaqalissapput. Nakorsat illoqarfinnut minnernut qinnuteqartarunnaarnissaat aalajangernerup kingunerissavaa, nal. sisamap kingorna pigaartuusarneq isertitaqarnerussutaanermigut suliffeqaannartitsinermut sakkutut atorneqartarmat.

Tamakku tamarmik ikinnerusut illoqarfinnut 1600-t inorlugit innuttalinnut qinnuteqartaneranik malitseqarlunilu atorfeqareersunik atorfeqaannartitsiniarnermi ajornakusoornerulersitsissasoq isumaqarluinnarpunga, aamma nunaqavissunut, tamannami suliffigissaarnermut aamma sunniuteqartussaammat.

Aalajangerneq tunngavilersugaanngilaq. Matumani sipaarniarneq pineqarsorinarpoq. Isumagali malillugu taamatut sipaarniarneq sipaarneqartunit amerlanerusunit aningaasartornermik malitseqassaaq, koruuninnaanngitsitigut aammali inuiaqatigiinnut tamarmiusunut. Peqqinnissaqarfimmut saaffiginniinnariaanerup innuttaasunut qanoq pingaaruteqartiginera tamatta nalunngilarput. Periarfissaq taanna maanna ajornerulersinneqarpat, sullissinerluunniit ajornerulerpat, tamanna piffinni innuttaasunut pitsaanngitsumik sunniuteqassaaq, inuerussaananermillu annertusaassalluni. Nakorsassaaleqineq aalajangernermi toqqammavigineqarpat, piffinni kalluarneqartut qanoq ililluni nakorsanut atorfeqarfissatut kajuminnarnerulernissaat taarsiullugu sammineqartariaqarpoq.

Innuttaasut taakkulu toqqissisimanissaat katsorsarneqarnissamullu periarfissanut pisinnaatiaaffii eqqarsaatigalugit, pisuni suut pingaarnerpaanerat isumaliutigilluarneqartariaqarpoq.

Apeqqutimma ullut suliffiusut qulit ingerlaneranni akineqarnissaat kissaatigaara.